

四庫全書

集部

欽定四庫全書

唐詩紀事卷十三

宋 計敏夫 撰

崔液

張元一

劉希夷

鄭遂初

王熊

房融

張敬忠

崔珪

沈祖仙

盧崇道

徐安期

張紘

薛曜

袁暉

李休烈

邵士彥

吳大江

劉幽求

賈曾

楊齊哲

魏元忠

李夔

司馬承禎

崔液

上元詩六首云玉漏銅壺且莫催鐵闌金鎖徹明開誰
家見月能閑坐何處聞燈不看來

今年春色勝常年此夜風光最可憐鵲樓前新月滿
鳳凰臺上寶燈燃

神燈佛火百輪張刻象圖容七寶裝影裏如聞金口說
空中似放玉豪光

金勒銀鞍控紫騮玉輪珠幟駕青牛驂驛始散東城曲

倏忽還來南陌頭

公子王孫意氣驕
不論相識也相邀
最憐長袖風前弱
更賞新絃暗裏調

星移漢轉月將微
露灑煙飄燈漸稀
猶惜道傍歌舞處
踟躕相顧不能歸

液字潤甫仁師之子
湜之弟也工五言舉進士第一人
湜嘗曰海子我家龜龍也
官至殿中侍御史坐湜故亡
命郢州作幽征賦以見意
遇赦還卒

張元一

武后朝左司郎中張元一善滑稽時西戎犯邊武懿宗
統兵禦之至邠畏懦而遯懿宗短陋元一朝曰長弓短
度箭蜀馬臨高踰去賊七百里隈墻獨自戰忽然逢著
賊騎猶向南竄則天未曉曰懿宗無馬耶元一曰騎猶
夾豕也則天大笑后嘗問元一外有何事曰有三慶旱
而雨洛橋成郭洪霸死

洪霸酷
吏也

劉希夷

將軍行云將軍闕轅門耿介當風立諸將欲言事逡巡
不敢入劍氣射雲天鼓聲破原隰黃塵塞路起走馬追
兵急彎弓從此去飛箭如雨集截圍一百里斬首五千
級代馬流血死邊人抱鞍泣古來養甲兵有事常討襲
乘我廟堂運坐使干戈戢獻凱歸帝京軍容何翕習

代悲白頭翁云洛陽城東桃李花飛來飛去落誰家洛
陽兒女惜顏色行逢落花長歎息今年花落顏色改明
年花開誰復在已見松柏摧為薪更聞桑田變為海古

人無復洛城東今人還對落花風年年歲歲花相似歲
歲年年人不同寄言全盛紅顏子須憐半謝白頭翁此
翁白頭真可憐伊昔紅顏美少年公子王孫芳樹下清
歌妙舞落花前光祿池臺開錦綉將軍樓閣畫神仙一
朝卧病無人識三春行樂在誰邊宛轉娥眉能幾時須
臾鶴髮亂如絲但看舊來歌舞地唯有黃昏鳥雀悲

唐新語云希夷一名庭芝汝州人少有文華好為宮體
詩詞旨悲苦不為時人所重善彈琵琶嘗為白頭翁詠

云今年花落顏色改明年花開復誰在既而自悔曰我
此詩識與石崇白首同所歸何異乃更作一聯云年年
歲歲花相似歲歲年年人不同既而歎曰此句復似向
識矣然死生有命豈復由此乃兩存之詩成未周歲為
奸人所殺或云宋之問害之後孫翌撰正聲集以希夷
詩為集中之最由是大為人所稱

或云之問害希夷而
以洛陽之篇為已作

至今載此篇
在之問集中

晚憇南陽旅館云旅館何年廢征夫此日過途窮人自

哭春至鳥還歌行路新知少
荒田古路多池篁覆丹谷
墳樹遶清波日照蓬陰轉
風微野氣和傷心不可去
回首怨如何

秋日題汝陽潭壁云
獨坐秋陰至悲來從所適
行見汝陽潭飛蘿蒙水石
懸瓢木葉上風吹何歷歷
幽人不耐煩振衣步閑寂
回流清見底金沙覆銀礫
洛水非一丈空隴幾千尺
魚鱗可憐紫鴨毛自然碧
秋水弄清光渺焉忘損益
遊山隨形影清濁混心迹
歲暮歸去來東山

余宿昔

故園置酒云酒熟人須飲
春還鬢已秋願逢十日醉得
緩百年憂舊里多青草新知
盡白頭風前燈易滅川上月
難留卒卒周姬旦棲棲魯孔
丘平生能幾日不及且
遨遊

夜集張諲所居云江南成久
客門館日蕭條唯有圖書
在多傷鬢髮凋諸生陪講
誦稚子給漁樵隱室寒燈淨
空階落葉飄滄洲自有趣
誰道隱須招

巫山懷古云巫山幽陰地神女艷陽年襄王伺容色落
日望悠然歸來高唐夜金釭焰青煙頽想卧瑤席夢魂
何翩翩搖落殊未已榮華倏徂遷愁思瀟湘浦悲涼雲
夢田猿啼秋風夜鴈飛明月天巴歌不可聽聽此益潺
湲

孤松篇云蠶月桑葉青鸞時柳花白澹艷烟雨滋敷芬
陽春陌如何秋風起零落從此始獨有南澗松不歎東
流水玄陰天地冥皓雪朝夜零豈不懼寒暑為君留青

青青好顏色落落任孤直羣樹遙相望衆草不敢逼
靈龜卜真隱仙鳥宜棲息恥受秦帝封願言唐侯食寒
山夜月明山冷氣清清淒兮歸風集吹之作琴聲松子
卧仙岑寂聽凝野心清冷有真曲樵採無知音美人何
時來幽逕委綠苔吁嗟深澗底棄捐廣厦材

鄭遂初

別離怨云蕩子戍遼東連年信不通塵生錦步障花送
玉屏風只怨紅顏改寧辭玉簫空繫書春雁足早晚到

雲中

萬歲通天年李迥秀下登第

王熊

熊自潭州至岳陽張燕公宴別贈詩二章云絲管清且
哀一曲傾一盃氣將然諾重心向友朋開古木無生意
寒雲若死灰贈君芳杜草為植建章臺

縉紳連省閣溝水遽西東然諾心猶在容華歲不同孤
城臨楚塞遠樹入秦宮誰念三千里江潭一老翁

熊峇云長沙辭舊國洞庭逢故人薰蘭敦久要披霧轉
相親歲月方嗟老江山不惜春忽聞黃鶴曲更作白頭
新

平生共風月倏忽間山川不期交淡水暫得欸忘年興
逸方罷釣帆開欲解船離心若危旆朝夕為君懸

韋嗣立嘗和前作并序云余昔忝省闈與岳州張使君
潭州王都督同官聯事後承朝譴各自東西張公與王
都督別詩二首情頗感切余覽以耿歎因追和焉

詩見
嗣立

房融

遊始興廣果寺山房云零落嗟殘命蕭條託勝因方燒
三界火遽洗六情塵隔嶺天花發凌空月殿新誰令鄉
國思從此學分身

融河南人武后時為宰相神龍元年貶死高州

張敬忠

先天中王主敬為侍御史自以才望華妙當入省望前

行忽除膳部員外微有悵惋吏部郎中張敬忠戲詠曰
有意嫌兵部專心望考功誰知腳踏蹬幾落省墻東蓋
膳部在省最東北隅也

張仁愿在朔方奏用御史張敬忠何長鸞等分摠軍事
太子文學柳彥昭為管記義烏尉昆良正為隨機皆著
稱敬忠自監察御史累遷吏部郎中開元七年拜平盧
節度使

崔珪

孤寢怨云征戍動經年含情拂玳筵花飛織錦處月落
擣衣邊燈暗愁孤坐牀空怨獨眠自君遼海去玉匣閉
春絃

珪開元中為太子詹事與兄中書舍人琳弟光祿卿瑤
俱列祭戟世號三戟崔家

沈祖仙

秋閨詩云白馬三軍客青娥十載思玉庭霜落夜羅幌
月明時爐冷蜘蛛喜燈寒熠燿期愁多不可曙流涕坐

空幃

盧崇道

新都南亭別郭大元振詩云竹徑女蘿蹊蓮洲文石隄
靜深人俗斷尋玩往還迷碧潭秀初月素林驚夕棲
褰幌納鳥侶罷琴聽猿啼佳辰改宿昔勝寄坐睽攜長懷
賞心愛如玉復如珪

崇道為太常卿坐其聳崔湜反俱流嶺南還歸至都為
其子娶崔氏女有內給使取充貴人崇道賂之令別娶

一崔氏女入內事敗并男三人皆勑杖至殞蓋廢宗時也

徐安期

催粧云傳聞燈下調紅粉明鏡臺前作好春不須面上
渾粧却留着雙眉待畫人

張紘

閨怨詩云去年離別雁初歸今夜裁縫螢已飛征客近
來音信斷不知何處寄寒衣

紘登久視六年進士第

薛曜

正夜待宴應制云重關鐘漏通夕敞鳳凰宮雙日祥煙
裏千門明月中酒盃浮湛露歌曲唱流風侍臣咸醉止
常慙恩遇崇

曜尚城陽公主子紹尚太平公主紹兄顓懼太盛以問
從兄克克曰帝甥尚主由來故事但以恭慎行之何懼
也曜堂姪倣子鏞自曜至鏞一門四公主

卷十三
曜元起之子也聖歷中附張易之官正諫大夫

袁暉

正月閨情云正月金閨裏微風繡戶間
曉魂憐別夢春思逼啼顏
遶砌梅堪折當軒樹未攀
歲華庭北上何日度陽關

七月閨情云七月坐涼宵
金波滿麗譙容華芳意改
枕席怨情饒錦字沾愁淚
羅裙緩細腰不如銀漢女
歲歲鵲成橋

二月閨怨云二月韶光好春風香氣多園中花巧笑林
裏鳥能歌有恨離琴瑟無情着綺羅更聽春燕語妾亦
不如他

三月閨怨云三春時將盡空房獨妾居蛾眉愁自結鬢
髮沒情梳

魏知古薦為左補闕開元中馬懷素欲校正羣籍暉自
邢州司戶參軍預焉

明皇東巡回出雀鼠谷暉應制云魏國山河險周王警

蹕迴九旗雲際出萬騎谷中來石岍行將盡煙郊望忽
開賞矜垂柳拂春畏落花催興逸橫汾體恩褒作頌才
小臣瞻日月延首詠康哉

李休烈

長壽三年則天徵天下銅五十餘萬斤鐵一百三十餘
萬斤於定鼎門內鑄八稜銅柱高九十尺徑一丈二尺
題曰大周萬國述德天樞紀革命之功貶唐家之德天
樞下置鐵山銅龍負載獅子麒麟圍繞上有雲蓋上施

盤龍以托珠高一丈圍三丈金彩熒煌光侔日月武三
思為其文朝士獻詩者不可紀惟李嶠詩冠絕當時曰
轍跡光西嶠勳庸紀北燕何如萬國會諷德九門前灼
灼臨黃道迢迢入紫烟仙盤正下露高柱欲承天山類
叢雲起珠疑大火懸聲流塵作劫業固海成田聖澤傾
堯酒薰風入舜絃忻逢下生日還偶上皇年後憲司發
嶠附會韋庶人左授滁州別駕而終開元中詔毀天樞
發卒鎔鑠彌月不盡洛陽尉李休烈賦詩以詠之曰天

門街裏倒天樞火急先須卸火珠計合一條絲線挽何
勞兩縣索人夫先有訛言云一條線挽天樞言其不經
久也故休烈詩及之士庶莫不諷詠天樞之比韋庶人

繼造一臺先此毀拆

出大唐
新語

邵士彥

秋閨詩云斜日空庭暮幽閨積恨盈細風吹帳冷微月
度牕明怨坐啼相續愁眠夢不成調琴欲有弄畏作斷
腸聲

吳大江

擣衣詩云沙塞秋應晚金閨恨已空那堪裂紈素時許
出房櫳杵影弄寒月砧聲調夜風裁縫雙淚盡萬里寄
雲中

劉幽求

幽求書懷云心為明時盡君門尚不容田園迷徑路歸
去欲何從

幽求冀州人臨淄王入誅韋庶人預參大策先天中為

相在同列下意望未滿已而竇懷貞崔湜附太平公主
有逆謀幽求說明皇圖之謀洩睿宗流之於封州明年
公主誅召復舊官開元初進左丞相以太子少保罷姚
崇忌之奏幽求鬱鬱散職有怨言詔有司鞠治盧懷慎
等奏幽求輕肆不恭失大臣體貶睦州刺史遷杭柳二
州恚憤卒于道

賈曾

洛陽人以孝聞開元初為中書舍人與蘇晉同掌制誥

時號蘇賈

曾孝和皇帝挽詞云新命千齡啟鴻圖累聖餘天行應
潛躍帝出受圖書禮若傳堯舊功疑復夏初夢遊長不
返何國是華胥

曾和宋之問下山歌云良遊晼晚兮月呈光錦路逶迤
兮山路長王孫不留兮歲將宴嵩崑仙草兮為誰芳

之問

詩見王
无競門

奉和春日出苑遊矚云彤闈曉闕問安迴金輅春遊博

望開渭北晴光搖草樹終南佳氣入樓臺招賢已得商
山老托乘還須鄴下才臣在東周獨留滯欣承睿藻日

邊來

時為太子舍
人使在東都

楊齊哲

過函谷關云地險峭函北途經今陝東逶迤衆山盡荒
涼古塞空河光流曉日樹影散朝風聖德今無外何處
是關中

魏元忠

侍宴銀潢宮應制云別殿秋雲上離宮夏景移寒風生
玉樹涼氣下瑤池
塹花仍吐葉
崑菌尚抽枝
願奉南山

壽千秋長若斯

元忠唐
史有傳

李夔

夔為汴州司戶使至汴州喜逢宋之問詩云阮籍蓬池
上孤韻竹林才巨源
從吏道正擁使車來
相逢且交臂
相命且銜盃
醉後長歌畢餘聲繞吹臺

之問荅曰遠方來下客
輜軒揖使臣
弄琴宜在夜
傾酒

貴逢春駟馬留孤館雙魚贈故人明朝雲雨散遙仰德
為隣

司馬承禎

宋之問吟冬宵引贈承禎云河有冰兮山有雪北戶墜
兮行人絕獨山中兮對明月懷美人兮屢盈缺明月的
的寒潭中青松幽幽吟勁風此情不向俗人說愛而不
見恨無窮


承禎答云時既暮兮節欲春山林寂兮懷幽人登竒峯

兮望白雲悵緬邈兮象郁紛白雲悠悠去不返寒風颼
颼吹日晚不見其人誰與言歸坐彈琴思逾遠

承禎字子徵事潘師正傳辟穀導引術無不通睿宗明
皇累召至京師問其術卒贈正一先生沈佺期贈詩云
紫微降天仙丹地授雲藻上言華頂事中間長生道華
頂居最高大壑朝陽早長生術何妙童顏後天老清晨
朝鳳京靜夜思鴻寶叙其被召之事也李白云余昔于
金陵見司馬子徵謂余有仙風道骨可以神遊八極之

表因著大鵬賦以見志焉

卷十三



唐詩紀事卷十三

欽定四庫全書

集部

唐詩紀事卷十四
五

詳校官監察御史臣沈孫鍾

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄貢生臣鄧友樞

欽定四庫全書

唐詩紀事卷十四

宋 計敏夫 撰

張說

宋璟

王邕

崔翹

王光庭

席豫

梁昇卿

源乾曜

張嘉正

盧從愿

韓休

徐知仁

崔禹錫

裴淮

韋杭

程行誥

李勗

蕭嵩

劉昇

裴光庭

宇文融

崔沔

崔尚

陸堅

崔泰之

崔日知

魏奉古

張說

人日迎春賜綵花詩云別館芳菲上苑東飛花澹蕩御
筵紅城臨渭水天河近闕對南山雲霧通繞殿流鸞凡
幾樹當蹊亂蝶許多叢春園既醉心和樂共識皇恩造
化同

送金城公主云青海和親日星潢出降時戎王子聳寵
漢國舊家慈春野開離宴雲天起別詞空彈馬上曲詎

減鳳樓悲

晦日漣水應制云千行發御柳一葉下仙筇青浦宸遊
至朱城佳氣濃雲霞交暮色草樹喜春容藹藹天旂轉
清笳入九重

餞唐州管使君云常時好閑燕朋舊少相過及爾宣風
去方嗟離別多淮流春晚晚江海路蹉跎百年屢分散

言歡復幾何

已上四首
中宗時作

說字道濟洛陽人相明皇為文屬思精壯長於碑誌諳

岳州後詩益悽婉人謂得江山助云

夜坐詩云懷哉四壁時未有五都價百金誰見許斗酒
難為貫落花生芳春孤月皎清夜復逢利交客題戶遙

相謝

岳陽早霽南樓云山水佳新霽南樓翫初旭夜來枝半
紅雨後洲全綠四運相終始萬形紛代續適臨青草湖
再變黃鸝曲地穴穿東武江流下西蜀歌聞枉渚遭舞
見長沙促心遠居無陋神和生自足白髮悲上春知常

謝無欲

岳陽石門墨山二山相連有禪道觀天下絕境詩云因
輪江上山近在華容縣常陟巴邱首天晴遙可見佳邀
屢前諾芳月愆幽眷及此符守移歡言臨道便既攜賞
心客復見送行掾竹徑入陰宵松岨上空蒨草共林一
色雲與峰萬變探窺石門斷緣越沙澗轉兩山勢爭雄
峰巘相顧盼藥妙靈仙寶境華巖壑選清都西淵絕金
地東敞宴池果接園畦風煙邇臺殿高尋去石頂曠覽

天宇徧千山紛滿目百川豁對面騎來雲氣迎人去鳥
聲戀長揖桃源士舉世同企羨

岳州山城云岳城豐日暇閉戶見天心東曠迎朝色西
樓引夕陰觀書千載近學靜二毛深忽有南風至吹君
堂上琴

岳州行郡竹籬云山郡不溝郭荒城無翳壅愛人忠主
利義守閉為勇苟非小勤瘁安得期逸寵板築恐土疎
襄城嫌役重藩柵聊可固筠篁近易奉差池截浦沙繚

繞緣隈隴矗似長雲巨森如高戟聳預絕豺狼憂知免
牛羊恐閭里寬矯步榛叢恣踏踵始果遊處心終日成
閑拱

出湖寄趙冬曦云西泛平湖盡參差入亂山東瞻岳陽
郡汗漫太虛間窘步同行樂道文亦屢看山戍上雲桂
江亭臨水關川途倏忽間風景依如昨湘浦未賜環荆
門猶主諾何時得余美載酒游宛洛

說謫岳州常鬱鬱不樂時宰以說機辨才畧互相排擯

蘇頲方火用說與瓌善說因為五君詠致書封其詩以
貽頲誠其使曰當候忌日近暮送之使者近暮弔客至
多說先公僚舊頲覽詩嗚咽流涕翌日上對大陳說忠
正蹇諤人望所屬不宜淪滯遐方上因降璽書勞問俄
遷荊州長史由是陸象先韋嗣立張庭珪賈曾皆以譴
逐歲久因加甄叙頲以父之執友事之甚謹

王泠然上燕公書云詩曰投我以木瓜報之以瓊琚此
言雖小可以喻大相公五君詠曰淒涼丞相府餘慶在

元成蘇公一聞此詩移公於荆府積漸至相由蘇得也
今蘇屈居益部公坐廟堂投木報瓊義將安在亦可舉
蘇以自代然後為朔方之行冷然書又曰相公岳陽送
別詩云誰念三千里江潭一老翁今日忘往日之棲遲
貪暮年之富貴乎

明皇封太山迴過金橋御路縈轉一望旌纛綿數十里
上曰張說言我勒兵三十萬旌旗徑五百里陝右上黨
至于太原

見后
上碑

真才子也召吳道子韋無忝陳闍同製

金橋圖

扈從南山雀鼠谷云豫動三靈贊時巡四海威破關凌
曙出平路半春歸霍鎮迎雲罕汾河送羽旂山南柳半
密北谷草全稀遲日宜華蓋和風入袷衣上林千里近
應見百花飛

將赴朔方軍應制云禮樂逢明主韜鈴用老臣恭憑神
武策遠御鬼方人供帳榮恩餞山川喜詔巡天文日月
麗朝賦管絃新幼志傳三畧衰材謝六鈞膽猶忠作伴

心故道為鄰漢保河南地胡清塞北塵連年大軍後不
日小康長劔舞輕離別歌酣忘苦辛從來思博望許國
不謀身

說赴集賢院學士上賜燕應制得輝字韻云侍帝金華
講千齡道固稀任將賢士設書共學徒歸首命深燕隗
通經淺漢韋列筵榮賜食送客愧儒衣賀鷲窺簷下遷
鷲入殿飛欲知朝野慶文教日光輝

三相同日拜官奉和御制云大塊鎔羣品經生偶聖時

猥承三任命虛忝百僚師右揆謀華碩前星傅重資連
騫求舊禮濫點樂賢詩賜釜同榮拜擬金宴宰司菊花
吹御酒蘭葉捧天詞寶歷休明盛頽年晷漏衰少留青
史筆未敢赤松期

恩賜燕樂遊園云漢苑佳遊地軒庭近侍臣共持榮幸
日來賞豔陽春饌玉頌王篚擬金下帝釣池臺草色徧
宮觀柳條新花綬光連榻朱顏暢飲醇聖朝多樂事天
意每隨人

醉中作云醉後方知樂彌勝未醉時動容皆是舞出語
摠成詩

雜詩云抱薰心常焦舉旆心常搖天長地自久歡樂能
幾朝君看西陵樹歌舞為誰嬌

五君詠

達志美類利異感義哀
事顏氏之心也擬焉

齊公生人表向天聞鶴唳清論早揣摩玄心晚超詣入
相廊廟靜出軍沙漠霽見深呂祿憂舉後陳平計甘心
除君惡足以報先帝

許公信國楨克美具瞻情百事資朝問三章廣世程處
高心不有臨節自為名朱戶傳新戟青松拱舊塋淒涼
丞相府餘慶在玄成

李公實神敏才華乃天授睦親何用心處貴不忘舊故
事尊臺閣新詩冠宇宙在人忠所奉惡我誠將宥南浦
去莫歸嗟嗟茂孫秀

代公舉鵬翼翻飛摩海霧志康天地屯適與雲雷遇興
喪一言決安危萬心注大勳書王府窄命淪江路勢傾

北夏門哀靡東平樹

耿公山岳靈才傑心亦妙鷲鳥峻標立良玉扣清調協
贊休明啟思華日月照何意瑤臺雲風吹落江徼湘流
下潯陽洒淚一投弔

宋璟

奉和明皇答張說南出雀鼠谷詩云秦地雄西夏并州
近北胡禹行山啟路舜在邑為都忽視寒暄隔深思險
易殊四時宗伯叙六義宰臣鋪徵作官常應星環日每

紆盛哉逢合道良以致亨衢

奉和聖製送張尚書巡邊云帝道薄存兵王師尚有征
是開司馬法爰命摠戎行畫閫崇威信分麾盛寵榮聚
觀方結轍出祖遂傾城聖酒山河潤天詞象緯明德風
邊草偃勝氣朔雲平宰國推良器為軍挹壯聲至和常
得體不戰即亡精以智泉寧竭其徐海自清遲遲廟堂
坐贈別故人情

奉和御製三相同日上官詩云丞相邦之重非賢諒不

居老臣庸且憊何德以當諸厚秩先為忝崇班復此除
太常陳禮樂中掖降簪裾聖酒山河潤仙文象緯舒冒
恩懷寵祿陳力省空虛郭隗慙無駿馮諷媿有魚不知
周勃者榮幸定何如

恩賜樂遊園宴詩云侍飲終酺會承恩續勝遊戴天惟
慶幸選地即殊尤北向祇雙闕南臨賞一邱曲江新溜
暖上苑雜花稠疊疊韶絃屢戛戛賁帛周醉歸填畛陌
榮曜接軒裘

右開元天子登封泰山南出雀鼠谷張說獻詩明皇御
答羣臣應制故明皇詩有川途猶在晉車馬漸歸秦之
句餞張尚書朔方者燕公說也明皇詩有三台入武帳
八座起文昌之句左丞相張說右丞相宋璟太子少傅
源乾曜同日上官錫宴東堂明皇賜詩有赤帝收三傑
之句故蘇晉序云天子作三傑之詩以命宴樂蓋為此
也

劉禹錫獻權舍人書曰昔宋廣平之沉下僚也蘇公味

道時為繡衣直指使者廣平投以梅花賦蘇盛稱之自是方列於聞人之目名遂振嗚呼以廣平之才未為是賦則蘇公果暇知其人耶將廣平困於窮阨於躓然後為是文耶是知英賢卓犖可外文字然猶用片言借說於先達之口席其勢而後驤首當時矧碌碌者疇能自異

皮日休桃花賦序曰余常慕宋廣平之為相正姿勁質剛態毅狀疑其鐵腸石心不能吐婉媚辭然覩其文而

有梅花賦清便富艷得南朝徐庾之體

王邱

奉和明皇荅張說南出雀鼠谷詩云襟帶三秦接旂常
萬乘過陽原淑氣早陰谷沍寒多花縹前茅仗霜嚴後
乘戈戍雲開晉嶺江鴈入汾河北土分堯俗南風動舜
歌一聞天樂唱恭遂萬人和

丘字仲山擢童子科能屬文為吏部侍郎典選其獎用
如孫逖張晉明王泠然皆一時茂秀蕭嵩引與當國丘

盛推韓休休秉政薦為御史大夫

撫言蕭穎士恃才傲物嘗携壺逐勝憇於逆旅風雨暴
至有紫衣翁領二僮避雨於此穎士頗侮之雨止老人
上馬呵殿而去穎士始知為丘也明日造門謝罪邱引
至廡下坐而責之復曰子負名傲忽其止於一第乎果
終於揚州工曹

崔翹

奉和明皇答張說南出雀鼠谷詩云破路繞河汾晴光

掃曙氛笳吟中嶺樹仗入半峯雲頓覺山原盡平看邑
里分早行芳草迥晚憇好風薰嘉頌推英宰春遊扈聖
君共欣承睿渥日月照天文

翹官至禮部尚書清河公

王光庭

奉和明皇答張說南出雀鼠谷詩云省俗恩時遍巡方
路稍迴寒隨汾谷盡春逐晉郊來雲騎傳行漏烟旄引
從臺惠風初應律和氣正調梅雅頌通宸詠天文接曙

台灞城桃李色應待日華開

奉和御製送張尚書巡邊詩云賢相德符充朝推文武
雄海波先若鏡闕草預從風鉞助將軍勇威成天子功
瓊章九霄發錫宴五衢通玉輶龍盤帶金裝鳳頸驄虎
貌分儼儼河洛震熊戈刃千霜白旌旗萬火紅示刑
夷夏變流惠鬼神同寇息軍容偃塵銷朔野空用師敷
禮樂非是為獯戎

張說送光庭詩云同居洛陽陌經日嬾相求及爾江湖

去言別悵悠悠楚雲眇羈翼海月倦行舟愛而不可見
徒嗟芳歲流光庭與燕公最善故云

席豫

奉和明皇答張說南出雀鼠谷詩云鳴鑿初幸代旋蓋
欲橫汾山盡千旗直郊平五校分前林已暄景後壑尚
寒氛風送簫韶曲花鋪黼黻文鹽梅推上宰禮樂統中
軍獻賦紆天札飄飄飛白雲

奉和聖製送張尚書巡邊詩云聖帝重兵權分麾屬大

賢中軍仍執政丞相復巡邊翕習戎裝動張皇廟畧宣
朝榮承睿札野餞轉行旃亭障東緣海沙場北際天春
冬見嚴雪朝夕候烽烟已勒燕山頌猶聞遣戍篇五營
將月合八陣與雲連經略圖方遠懷柔道更全歸來畫
麟閣藹藹武功傳

豫字建侯年十六舉手筆俊拔科中之後為中書舍人
與韓休許景先徐安正孫逖名相甲乙當時號為席公
帝嘗登朝元閣賦詩羣臣屬和帝以豫詩最工詔曰詩

人之冠冕也

梁昇卿

奉和明皇荅張說南出雀鼠谷詩云何意重關道千年
遇聖皇幽林承惠澤閑客見清光日御仙途遠山靈壽
域長寒雲入晉薄春樹隔汾香國佐同時雨天文屬歲
陽從來漢家盛未若此巡方

昇卿與張九齡善涉學工書於八分尤工歷廣州都督
書東封朝覲碑為時絕筆

源乾曜

奉和御製送張尚書巡邊云匈奴邇河朔漢地復戎旅
天子擇英材朝端出監撫流星下閭闔寶鉞專公輔禮
物生光輝宸意備思詡有征示矛戟制勝惟罇俎彼美
何壯哉桓桓擅斯舉聲華振臺閣功德標文武奉國知
命輕忘家以身許安人在勤恤保大殫襟腑此外無異
言同情報明主

送張說上集賢學士賜讌賦詩得迎字云盛業光書府

徵人盡國英，絲綸賢得相。羣俊學為名，寵命垂天賜。崇
恩發睿情，薰風清禁籞。文殿述皇明，日霽庭陰出。池新
水氣生，歡娛此無限。詩酒自相迎。

奉和御製賜三相同日上官云，睿作超千古，湛恩育萬
人。遞遷俱荷澤，同拜忽為隣。道合音徽暢，芳馳景命新。
鼓鐘崇享禮，鵷鷺集朝倫。竊位思官諤，彫容謝木春。慙
多無以叙，拙備實難陳。進級懷三少，承光盡百身。自當
歸第日，何幸列宮臣。

乾曜開元初姜皎薦於帝召見神氣爽徹占對有序帝
悅之性謹重與張嘉正張說李元紘同秉政居中書未
嘗廷議可否皎為嘉正所排得罪訖不申救君子譏焉

張嘉正

奉和御製送張尚書巡邊云天錫我宗盟元戎付夏卿
多才思命將必勇獨橫行經緯稱人傑文章作代英山
川看是陣草木想為兵不待河水合猶防漢月明有謀
當繫醜無戰是綏氓聞外專三略雲中冀一平感恩共

心盡張別屢魂驚直視前旌掣遙聞後騎鳴還期方定
日復此出郊迎

嘉正性簡疏與人不疑所薦中書舍人苗延嗣呂太一
考功負嘉靖侍御史崔訓時語曰令君四俊苗呂崔負
始為中書舍人崔湜輕之後與議事正出其上湜驚曰
此終其坐後十年而為中書令

盧從愿

奉和御製送張說巡邊云上將發文昌中軍靖朔方占

星引旌節擇日拜壇場禮樂臨軒送威聲出塞揚安邊
俟帷幄制勝在巘廊作鼓將軍氣投醪壯士觴戒途遵
六月離贈動三光槐路清梅暑蘅臯赴麥涼時文仰雄
伯耀武震遐荒衽席知無戰兵戈示不忘佇聞歌杖杜
凱入繫名王

從愿字子襲舉制科高第為兵部尚書數充校考使御
史中丞宇文融將以括田戶功為上下考從愿不許乃
密白從愿盛植產占良田數百頃帝自此薄之目為多

田翁後欲用為相屢矣卒以是止

韓休

奉和御製送張尚書巡邊云一德光台象三軍掌夏卿
來威申廟畧出總協師貞受鉞辭金殿凭軒去鼎城曉
光搖組甲踈吹繞雲旌左律方先凱中鼙即訓兵定功
彰武事陳頌紀天聲祖宴初留賞宸章更寵行車徒零
雨送林野夕陰生路極河流遠川長朔氣平南轅遲反
旆歸奏謁承明

休知制誥蕭嵩薦與同秉政帝重之

徐知仁

奉和御製送張尚書巡邊云聖德膺三統皇威被八埏
大明均照物小醜未寧邊國相台衡重元戎廟畧宣紫
泥方受命黃石乃推賢問罪陰山下安人屬國前度關
行照月乘障坐消烟北闕紆宸藻南橋列祖筵耀威當
夏日殺氣指秋天鼙鼓龜鼉振旌旗鳥獸懸由來詞翰
手今見勒燕然

崔禹錫

奉和御製送張尚書巡邊云供帳何煌煌公其撫朔方
羣僚咸餞酌明主降離章關塞重門下郊岐禁苑傍練
兵宜雨洗卧鼓候風涼炎景寧云憚神謀肅所將旌搖
天月迴騎入塞雲長赫赫皇威振油油聖澤滂非惟按
車甲兼以正封疆叱咤陰山道澄清瀚海陽虜垣行決
勝台座佇為光

禹錫字洪範登顯慶三年進士第為中書舍人

裴淮

送張說上集賢學士賜讌賦得昇字云問道圖書盛尊
儒禮教興石渠因學廣金殿為賢昇日月恩光照風雲
寵命膺謀謨言可範舟楫事斯憑宴喜明時洽光輝湛
露凝大哉堯作主天下頌歌稱

淮與張說善說為相數薦之淮長於敷奏天子亦甚重
焉

韋杭

送集賢學士張說上官賜讌賦得西字云廣庭臨璧沼
多士侍金閨英宰文儒協明君日月齊集賢光首拜改
殿發新題早夏初移律餘花尚拂溪壺觴接雲上經術
引關西聖德鴻名遠將陪玉檢泥

杭終於刑部尚書所薦如梁昇卿王倓王壽後皆為顯
人唐史稱之

程行謨

送張說上集賢學士賜讌賦得廻字云聖主崇文化鏘

鏘得盛才相因歸夢立殿以集賢開象繫微言闡詩書
至道該堯罇承帝澤禹膳自天來禮洽歡逾長風恬暑
更迴國朝將舜頌同是一康哉

裴子餘補鄆尉行謚與之同舍行謚以文法稱而子餘
以儒顯長史陳崇業曰蘭菊異芬無可廢者二子卒子
餘謚孝行謚正張說嘆曰二謚可無愧矣

李暹

送張說上集賢學士賜燕得催字云偃武堯風接崇文

漢道恢集賢更內殿清選自中台佐命留侯業詞華博物才天厨千品降夏首百壺催鵷鷺方成列神仙喜暫陪復欣同拜首叨此頌良哉

蕭嵩

送張說上集賢學士賜讌得登字云帝曰簡才能旌賢在股肱文章體一變禮樂道逾宏芸閣英華入賓門鵷鷺登恩進過所望聖澤實超恒夏葉開紅藥餘花發紫藤微臣亦何幸叨此預文明

奉和御製三相同日上官詩云審官思共理多士屬性
唐歷選台庭舊來熙帝業昌入朝師百辟論道協三光
垂拱資元老親賢輔少陽登榮崇禮送寵德耀宸章御
酒飛觴洽仙闈雅樂張荷恩思有報陳力愧無良願罄
公忠節同心奉我皇

嵩開元初權中書舍人崔琳王邱齊澣以嵩少學術不
以輩行許也獨姚崇稱其遠到帝欲相蘇頲嘗夜密召
嵩草詔其詞曰國之壞寶帝曰朕不斥其父名卿當為

刊削沈思久之乃曰國之珍寶嵩出帝曰虛有其表嵩
頤大多髭故帝有是言

劉昇

送張說上集賢學士賜讌得賓字云圖書應明主策府
宴嘉賓台耀臨東壁乾光自北辰網羅窮象繫述作究
天人聖酒千鍾洽仙廚百味陳成山徒可仰涉海詎知
津幸逢文教盛還覩頌聲新

昇能文善草隸德威之後也開元中累遷中書舍人

裴光庭

奉和御製三相同日上官詩云樂賢聞往誥褒德偶茲
辰端揆升元老師謀擇累仁紫庭崇讓畢粉署禮容陳
既荷恩榮舊俱承寵命新天文懸瑞色聖酒汎華茵雜
逕陳簫鼓歡娛洽縉紳掖垣招近侍虛薄廁清塵共保堅
貞節當期雨露均

光庭字連城時為兵部侍郎後為相謨瑤山往則維城
前軌二篇獻之手制褒美詔皇太子諸王於光順門見

光庭謝所以規諷意

宇文融

奉和御製三相同日上官詩云申甫生周日宣慈舉舜
年何如偶昌運比德邁前賢寵獲元良密榮瞻瑞揆遷
職優三事老位極百僚先北極迴宸渥南宮飾宴筵飛
文瑤札降賜酒玉杯傳謬列台衡重俱承雨露偏誓將
同竭力相與効塵涓

融為張說所惡欲先事中傷說張九齡謂說曰融辯洽

多詐公不可忽說曰狗鼠何能其後乃與崔隱甫廷劾
說受賕事帝詔說致仕而出融詩有誓將同竭力相與
効塵涓之語欣附說之辭也

融安輯戶口明皇賜詩張說奉和云聖德臨天下勞情
遍九圍念茲人去本蓬轉將何依外避征戍數內傷親
黨稀嗟不逢明盛胡能照隱微栢臺簡行李蘭殿錫朝
衣別曲動秋風恩令生春輝使出四海安詔下萬心歸
作無夔龍佐徒歌鴻雁飛

崔沔

恩賜樂遊園宴云五日酺初畢千年樂未央復承天所
賜終宴園之陽地勝春逾好恩深樂更張落花飛廣座
垂柳拂行觴庶尹陪三吏諸侯具萬方酒酣同抃躍歌
舞詠時康

沔字善冲有才章舉賢良方正第一最受知於張說儉
約自持嘗作陋室銘以見志云

崔尚

恩賜樂遊園宴云春日照長安皇恩寵庶官合簪承寵
飲宴帛賜追歡供帳憑高列城池入迴寬花催相國飲
烏和樂人彈北闕雲中見南山樹杪看樂遊宜締賞舞
詠惜將闌

尚登久視六年進士第官至祠部郎中

陸堅

送張說上集賢學士應制得今字云聖主崇文教層霄
降德音尊賢澤既厚式宴寵逾深復有變龍相良哉帝

簡心得人惟邁昔多士諒推今書殿榮光滿儒門喜氣
臨顏惟成濫吹徒此接衣簪

堅為中書舍人以集賢學士或非其人而供儼太厚議
白罷之張說曰麗正乃天子禮樂之司所費細而所益
者大陸生之言益未達耶帝知遂薄堅

崔泰之

酬韋嗣立龍門北溪作云關塞臨伊水驪山枕灞川俱
臨隱路側同在帝城邊謝公兼出處攜妓玩林泉鳴騶

噴梅雪飛益曳松煙聞琴幽谷裏看奕古巖前落月低
幃帳歸雲繞管絃叨榮慙北闕微尚愛東田寂寞灰心
盡蕭條塵事捐朝思登嶽絕夜夢弄潺湲宿懷南澗意
况覩北宮邊

同光祿弟冬日述懷序云韋祭酒張左丞二公並廊廟
偉才朝廷舊相咸光首和殊為佳作輒繼陽春深增媿
悚詩云吾族白眉良才華動洛陽觀光初入仕應宿始
為郎飛螢翫書籍白鳳吐文章海鄉逾往雅河尹冠前

張擇才綏陽郢殊化被江湘高樓臨廣陌甲第敞通莊
別館邛山下疏亭洛水傍昌年賞豐陌暇日悅林塘衣
冠皆秀茂羅綺盡名倡隔岸聞歌度臨池見舞行門庭
寒變色榮戟自生光窮陰方靄黷殺氣正蒼茫感時興
感作晚歲共多傷積德韋丞相通神張子房吟草徧簪
絨逸韻合宮商功名守留省濫跡在文昌家園遙可見
臺寺近相望無庸乘侍謁有暇共翱翔隸華依雁序竹
葉拂鸞觴水坐憐秋月山行弄晚芳恩榮慙服冕友愛

篤垂堂無由報天德相顧詠時康

韋祭酒嗣立張左丞說光祿日知也

秦之時以禮部居洛故與嗣立說日知數有酬唱秦之知溫之子初以職方郎中預平二張終於工部尚書

崔日知

和韋嗣立龍門北溪作云夙齡秉微尚中年忽有隣以茲山水僻遂得學通人迨我南京道聞君北業新崑前窺石鏡河畔踏芳茵既憐伊浦綠復憶灞池春連詞謝家子同歡寄野賓趣閑魚共樂情洽鳥來馴誰念昔遊

者祇命獨留秦蕭條潁陽戀沖漠漢陰真無由陪勝躅
空此翫書筠

冬日述懷奉呈韋祭酒張左丞蘭臺名賢云弱齡好經
籍披卷即怡然覃精四十載馳騁數千言孔壁採遺篆
周韋考絕編袁公論劔術孫子叙兵篇魯史君臣道姬
書日月懸從師改炎燠負笈遍山川上異西河夏中非
北海玄光榮拾青紫名價接通賢既重萬鍾樂寧思二
頃田長戟同兮虎高冠亞附蟬晚懷重虛曠養志息雕

鐫登高慙思拙匠物謝情妍不慕張平子寧希王仲宣
誰為登龍日翻成刻鵠年循循勞善誘軋軋思微牽琢
磨才既竭鑽仰德彌堅朽木誠為諭捫心徒自憐終期
吞鳥夢振翼上雲烟賦成先擲地詞高直挾天更執摠
衣禮仍開函丈筵露披槐市藹水靜璧池圓願逐從風
葉飛舞翰林前

日知字子駿日用從父兄與張說同為魏元忠朔方判
官再遷洛州司馬譙王重福之變以功加銀青光祿大

夫遷殿中少監日知在洛日與韋嗣立張說酬唱故說
和冬日述懷詩序云太極殿衆君子分司洛城自春涉
秋日有遊訪崔光祿述志論文首貽雅唱諸公嘉德序
事咸有報章若夫盛時榮位華景勝會此四者古難一
遇而我輩實兼之嗣立亦序云僕忝臺閣早經聯事崔
公以雅道自居未嘗至偃之室僕羸疾收退門堪羅雀
公存訪不避風雨方知向時跡也今晨情也蘭菊春秋
自芳竹柏歲寒無變故嗣立詩有昌年雖共偶歡會此

難并為憐漳浦曲沈痼有劉楨之句說詩云夫君邁前
侶觀國騁竒姿山似鳴威鳳泉如出寶龜又曰紫綬拂
三寺朱門臨九達其貴盛如此後為太常卿自以處朝
廷久每入謁必與尚書齒時謂尚書裏行後為潞州長
史卒初赴潞州明皇賜詩云潞國開新府壺關寵舊臨
妙旌循吏德持悅庶民心蓋潞為明皇舊鎮故也張說
和云聖情垂曩鎮佳氣翊興王增戟雄都府高車轉太
常川橫八澗濶山帶五龍長連帥初恩命天人舊紀綱

餞塗飛御藻闔境自輝光明主招循吏何年下鳳凰

魏奉古

和韋嗣立龍門北溪作云有美朝為貴幽尋地自偏踐
臨伊水洎想望灞池邊是遇皆新賞茲遊若舊年藤蘿
隱路接楊柳御溝聯道愜神情王機忘俗理捐遂初誠
已重兼濟實為賢跡是東山戀心惟北闕前顧慙經拾
紫多謝賦思玄未躡中林步空承麗藻傳陽春和已寡
扣寂竟徒然

龍門北溪韋嗣立山居在焉諸公賦詩奉古詩預酬唱
之末張說序崔韋贈荅詩云二公述志論文首貽雅唱
其餘尋聲響荅望形影赴故亦峻碧池之漣漪增瑤林
之沃若蓋奉古之徒是也

唐詩紀事卷十四

欽定四庫全書

唐詩紀事卷十五

宋 計敏夫 撰

王灣

魏知古

許景先

姚崇

姜皎

姜晞

王岳靈

楊顏

鄭繇

張諤

趙仁獎

張暈

金昌緒

蘇晉

張九齡

崔國輔

王灣

奉使登終南山詩云常愛南山遊因而盡原隰數朝至

林嶺百仞登嵬岷石壯馬徑窮苔色步緣入物竒春狀
改氣遠天香集虛洞策杖鳴低雲拂衣濕倚巖見廬舍
入戶欣拜揖問性矜勤勞示心教澄習玉英時共飲芝
草為余拾境絕人不行潭深鳥空立一乘從此受九轉
兼是給辭處若輕飛翹來唯吐吸閑襟超已勝迴路倏
而及煙色松上深水流山下急漸平逢車騎向晚睨城
邑峰在野趣繁塵飄宦情緝辛苦久為吏勞生何妄執
日慕懷此山悠然賦斯什

閏月七日織女云耿耿曙河微神仙此會稀今年七月
閏應得兩回歸

灣登先天進士第開元初為滎陽主簿馬懷素欲校正
羣籍灣在選中各部撰次後為洛陽尉商璠云灣詞翰
早著為天下所稱寂者不過一二遊吳中江南意云海
日生殘夜江春入舊年詩人以來無聞此句張公居相
府手題於政事堂每示能文令為楷式又擣衣篇云月
華照杵空悲妾風響傳砧不見君所有衆制類咸若斯

非張蔡之輩未見覺顏謝之彌遠乎江南意云南國多
新意東行伺早天潮平兩岼失風正數帆懸海日生殘
夜江春入舊年從來觀氣象唯向此中偏

麗正殿賜同宴用天前煙年四韻應制云金殿忝陪賢
瓊羞忽降天鼎羅仙掖裏觴拜鎖闈前院逼青霄路厨
知紫禁煙酒酣空抃舞何以荅昌年

秋夜寓直即事懷贈蕭令公裴侍郎兼通簡南省諸友
人云聖主萬年興賢臣數載升古靈傳岳秀宏量稟川

澄畿甸舉長策風霜秉直繩出車遙俗震登閣滿朝稱
賦簡流亡輯農安政理憑還家新長幼巡隴舊溝塍忠
梗大勲立寰瀛墮業懲焚香兼御史懸鏡委中丞旃隼
當朝立臺駟發郡乘司徒漢家重國典潁川徵雲路俄
平八台階忽上凌東鈞調造化宣綽慰黎蒸金省方秋
作瑤軒直夜凭中書贈陳準右相簡王陵三傑賢更穆
百僚歡且兢遙懷及賓友計曲辨淄澗闔闔暝陰散鈞
陳爽氣凝月深宮樹轉河近禁樓冰甲吏夙駟策微涓

効斗升望麾宵繼火書板曙懷蒸彼此雖流眇規模轉
服膺惠將霄漢隔勞或歲時矜位重恩寧濫才輕懾不
勝林巒甘獨往疵賤苦相仍敢忘銜花雀思同附驥蠅
平生逐鳥雀何日似蒼鷹

晚春詣蘇州贈武員外云蘇臺憶季常飛棹歷江鄉持
此功曹掾初離華省郎貴門生禮樂明代秉文章嘉璧
位先進洪儒名重揚援從姻戚貶豈失忠信防萬里行
驥足十年睽鳳翔迴邇翊元聖入拜佇為良別業對南

浦羣書滿北堂意深投轄盛才重接筵光陋學叨鉛簡
弱齡許翰場神馳勞舊國顏展別殊方際晚雜紛散殘
春衆物芳煙和踈樹滿雨續小溪長旅拙感成慰通賢
顧不忘從來琴曲罷開匣為君王

晚夏馬升卿池亭即事寄京中二三知己云忝職畿甸
淹濫陪時英後才輕策疲劣勢薄常駟走牽役勞風塵
秉心在巖藪宗賢開別業形勝代稀偶竹澆清渭涓泉
流白渠口逡巡期賞會揮忽變星斗逮此乘務餘因而

訪幽叟入來殊景物行復洗紛垢林淨秋色多潭深月
光厚盛香蓮近折新味瓜初剖滯拙懷隱淪書之寄良
友

奉同賀監林月清酌云華月當秋滿朝英假興同淨林
新霽入窺院早涼通碎影行筵裏搖花落酒中清宵凝
爽意併此助文雄

觀搗箏云虛室有秦箏箏新月復清絃多弄委曲柱促
語分明曉怨凝繁手春嬌入慢聲近來唯此樂傳得美

人情

魏知古

知古深州人相睿宗薦洹水令呂太一蒲州司功參軍
齊澣內率騎曹參軍柳澤密尉宋遙左補闕袁暉右補
闕封希顏伊闕尉陳希烈後皆為聞人

玄元觀尋李先生不遇詩云羽客今何在空尋伊洛間
忽聞歸苦縣應想入函關未作十年別猶應七日還神
仙不可見寂寞返蓬山

奉和春日途中喜雨應詔詩曰豫遊欣勝地皇澤乃先天
油雲陰御道膏雨潤公田隴麥霑逾翠山花濕更燃
稼穡良所重方復悅豐年

春夜寓直鳳閣懷羣公詩云拜門傳漏晚寓省索居時
昔重安仁賦今稱伯玉詩鴛池滿不溢雞樹久逾滋夙
夜懷山甫清風詠所思

先天初為侍中從獵渭川獻詩曰嘗聞夏太康五弟訓
禽荒我后來冬狩三驅盛禮張順時鷹隼擊講事武功

揚奔走未來去翺飛豈暇翔非熊從渭水瑞翟想陳倉
此欲誠難縱茲遊不可常子雲陳羽獵僖伯諫漁棠得
失鑒齊楚仁思念禹湯邕熙諒在宥亭毒匪多傷辛甲
今為史虞箴遂孔彰手詔褒之

知古卒宋璟歎曰叔向古遺直子產古遺愛兼之者其
魏公乎

許景先

常州人先獻賦李迥秀見之歎曰是宜付太史後與齊

潞王邴韓休更知制誥張說曰許舍人之文雖乏峻峰
激流然詞旨豐美得中和之氣天寶間以吏侍卒陽春
怨云紅樹曉鶯啼春風暖翠閨雕籠薰繡被珠履踏金
堤芍藥花如吐菖蒲葉正齊藁砧當此日行役向遼西
送張說巡朔方應制云文武承邦式風雲感國楨王師
親賦政廟略久論兵漢主知三傑周官統六卿四方分
閩受千里坐謀成介冑辭前殿壺觴宿左營賞延頒賜
重宸贈出車榮龍武三軍氣魚鈴五校名郊雲駐旌羽

邊吹引金鉦振旅方稱德安人更克貞佇觀銘石罷同
聽凱歌聲

姚崇

享龍池樂章云恭聞帝里生靈祉應報明君鼎業新既
叶翠泉光寶命還符白水出真人當時舜海潛龍躍此
日堯河帶馬巡獨有前池一小鴈叨承舊惠入天津又
云帝宅王家大道邊神馬潛龍涌聖泉昔日昔時經此
地者來看去漸成川歌臺舞榭宜正月柳岬梅洲勝往

年莫疑沙上春雲少祗為龍飛直上天

龍池興慶宮池也明皇潛龍之地張九齡撰龍池頌刊石興慶宮玄宗以為不稱更命嗣澤王瑒為頌建花萼樓北初睿宗五子賜第隆慶坊號五王宅明皇為太子製大衾長枕將與諸王共之睿宗喜甚明皇先天後盡以隆慶舊邸為興慶宮而賜憲薛第於勝業申岐第於安興環列宮側天子於宮西南置樓西曰花萼相輝南曰勤政務本

張曲江有和姚令公哭李尚書詩姚亦時有述作然少見於世

口箴云君子欲訥吉人寡辭利口作戒長舌為詩斯言不善千里違之勿謂可復駟馬難追惟靜惟默澄神之極去甚去泰居物之外多言多失多事多害聲繁則淫音希則大室本無暗垣亦有耳何言者天成蹊者李似不能言為世所尊言不出口冠時之首無掉爾舌以速爾咎無易爾言亦孔之醜欽之慎之可大可久欽之伊

何三命而走慎之伊何三緘其口勉哉夫子行矣勉旃
書之屋壁以代韋絃

李德裕舌箴序云余宿於洞庭西夢與中書令姚公偶
坐如舊相識問余曰君見僕所作口箴乎余對曰去歲
居守東周於公曾孫諫議邵處觀金石之刻遂莞爾而
笑曰孫子猶能藏之又曰余感姚公之夢乃為舌箴云

姜皎

享龍池樂章云龍池初此出龍山常經此地謁龍顏日

日芙蓉生夏水年年楊柳變春灣堯壇寶匣餘煙霧舜
海魚舟尚往還願似飄飄五雲影從來從去九天間

又云龍興白水漢興符聖主時乘運斗樞岍上芊茸五
花樹波中的皦千金珠慘環昔聞迎夏啓發匣先來瑞
有虞風色雲光隨隱見赤雲神化象江湖

皎長安中為尚衣奉御明皇在藩邸識其有非常度委
心焉及即位授殿中少監出入卧内開元十年為秘書
監坐洩禁中語流欽州道死

姜晞

龍池樂章云靈池縈迴邸第前浴日涵春寫曙天始見
龍臺昇鳳闕應如霄漢起神泉石匱渚傍還啓聖桃李
初生更有仙欲化帝圖從此受正同河變一千年

又云乾坤啓聖吐龍泉泉水年年勝一年始看魚躍方
成海即覩龍飛利在天洲渚遙將銀漢接樓臺直與紫
微連休氣榮光常不散懸知此地是神仙

晞登永隆二年進士第

王岳靈

聞漏詩云建禮含香處重城待漏臣徐聞傳鳳詔曉唱
辨雞人銀箭殘將盡銅壺漏更新催籌當午夜移刻及
三辰杳杳從天遠泠泠出禁頗直宜殘漏曙肅肅對鈞
陳

岳靈登開元進士第天寶十年為監察御史撰張惡子
廟碑

楊顏

田家云小園足生事尋勝日傾壺蒔蔬利於鶩繞青閭
已無四隣因野竹日夕採其枯田家心適時春色遍桑
榆

顏登開元進士第

鄭絲

失白鷹詩云白錦文章亂丹青羽翮齊雲中呼暫下雪
裏放還迷梁苑驚池鶩陳倉拂野鷄不知寥廓外何處
獨飛棲

開元初經慈澗題詩云岍與恩同廣波將慈共深涓涓
勞日夜長似下流心

繇鄭州人登嗣聖元年進士第開元時岐王範愛儒士
繇與劉廷琦閻朝隱張諤皆遊其門飲酒賦詩相娛樂
子審有詩名終於袁州刺史與杜子美善

張諤

九日詩云秋天林下不知春一種佳遊事也均絳草從
朝飛着夜黃花開日未成旬將衡陌樹頻驚馬半醉歸

途數問人城遠登高併九日茱萸凡作幾年新

諤登景龍進士第岐王範好儒士與閻朝隱劉廷琦鄭
繇等飲酒賦詩駙馬都尉裴虛已善識緯坐私與範游
徙嶺南廷琦貶雅州司戶諤山在丞然明皇於範無間
也

趙仁獎

令乘驄馬去丞脫繡衣來仁獎送上蔡令潘好禮拜御
史詩也或訝其假手蓋仁獎住王戎墓側善歌黃麈景

龍中負薪詩闕云助國調鼎即除臺官中書令姚崇曰
此是黃麋耶授以當州一尉惟以黃麋自銜宋務光朝
之曰趙仁獎出王戎墓下入朱博臺中捨彼負薪登茲
列栢行人不避驄馬坐客惟聽黃麋忽一夫負兩束薪
曰此合拜殿中人問其由曰趙以一束拜監察此兩束
合授殿中

張暈

遊棲霞寺云躋險入幽深翠微含竹殿泉聲無休歇山

色時隱見潮來雜風雨梅落成霜霰一從方外遊頓覺
塵心變

潤州延陵有包融儲光義曲阿有丁仙芝緱氏主簿蔡
隱丘監察御史蔡希周渭南尉蔡希寂處士張彥雄張
朝校書郎張暈吏部常選周瑀長洲尉談馱句容有殷
遙破石主簿樊光橫陽主簿沈如筠江寧有右拾遺孫
處士徐延壽丹徒有江都主簿馬佺武進尉申堂溝十
八人皆有詩名殷璠次為丹陽集暈開元進士蕭穎士

同年生也

蕭穎士有張暈下第歸江東詩云俱飛仍失路綵服邇
清波地積東南美朝遺甲乙科客愁千里別春色五湖
多明日舊山去其如相望何

金昌緒

春怨詩云打却黃鸝兒莫教枝上啼幾迴驚妾夢不得

到遼西

顧陶取此詩
為唐類詩

昌緒餘杭人

蘇晉

晉中宗戶部尚書珣之子數歲知為文吏侍房穎叔秘書少監王紹宗曰後來之王粲也先天中為中書舍人杜暹當國表宋璟為吏書晉齊澣為侍郎世謂臺選

過賈六詩云主人病且閑客來情彌適一酌復一笑不知日將夕昨來屬歡遊於今盡成昔努力持所趣空名定何益

丞相少傅拜職天子作三傑之詩以宴命晉序云惟聖

寶賢以齊皇極有若左丞相燕國公右丞相廣平公太
子少傅安陽侯皆生人碩德皇國元老道著廊廟績宣
華戎由是懋其成功錫以元圭咨日于朔擇時于秋俾
對命王庭受職公府見羣屬揖庶寮禮官辨章掌舍陳
次警工備樂侑饗獻蒸六御拜下以成儀三事自天而
來賀秩秩賓序暉暉旅疇玉緯垂文南風和雅頌之變
金漿降疇雲天光飫酌之宜宰德貴和盡莊敬具瞻之
範羣情尚洽預周旋宴語之歡方將一心天工戮力帝

載寢黑山之柝包青海之戈雲雨賢才水火菽粟日詠
魚藻歲陳由庚頤殷趙之年留魯陽之景爰命在宴乃
賡載歌時左相張說右相宋璟太子少傅源乾曜同日
上官命宴于東堂明皇賜詩曰赤帝收三傑黃軒舉二
臣故序及之

送張說巡邊應制云方漢比周年興王合在宣亟聞降
虜拜復覩出師篇圻父萬邦貳英猷三略傳筭車申夏
政芟舍啓戎田嚴問盟胡苑軍容濟洛川皇情悵闕旆

詔餞列郊筵路接禁園草池分御井蓮離聲軫去角居
念斷歸蟬三捷豈云爾七擒良信然具寮誠寄望奏凱
秋風前

張九齡

在郡秋懷二首秋風入前林蕭瑟鳴寒枝寂寞遊子思
寤歎何人知官成名不立志在歲已馳五十而無聞古
人深所疵平生去外飾直道如不羈未得操割效忽復
寒暑移物情有固然身退毀亦隨悠悠滄海渚望望白

雲涯露下霜且降澤中草披離蘭艾若不分安用馨香
為

庭蕪生白露歲候感遐心策蹇慙遠塗巢枝思故林小
人恐致寇終日如臨深魚鳥好自逸池龍安所欽掛冠
東都門採薇南山岑議道誠愧昔覽分還愜今憮然憂
成老空爾白頭吟

感寓云蘭葉春葳蕤桂華秋皎潔欣欣此生意自爾為
佳節誰知林棲者聞風坐相悅草木有本心何求美人

折

段成式云桂花三月生黃而不白曲江云桂華秋皎潔安矣

幽林歸獨卧滯慮洗孤清持此謝高鳥因之傳遠情日夕懷空意人誰感至精飛沉理自隔何所慰吾誠

魚遊樂深池鳥棲欲高枝嗟爾蜉蝣羽薨薨亦何為有生豈不化所感奚若斯神理日微滅吾心安得知浩歎楊朱子徒然泣路岐

孤鴻海上來池潢不敢顧側見雙飛鳥巢在三珠樹矯矯珍木巔得無金丸懼美服患人指高明逼神惡今我

遊冥冥弋者何所慕

吳越數千里夢寢今夕見形骸非我親衾枕卽鄉縣化
蝶猶不識川魚安可羨海上有仙山歸期覽神變

抱影吟中夜誰聞此歎息美人適異方庭樹銜幽色白
雲愁不見滄海飛無翼鳳凰一朝來竹花此可食

漢上有遊女求思安可得袖中一書札欲寄雙飛翼冥
冥獨不見耿耿徒絨憶紫蘭秀空蹊皓露奪幽色馨香
歲欲晚感歎情何極白雲在南山日暮長太息

九齡在相位有蹇諤匪躬之誠明皇旣在位久稍怠庶
政每見帝極言得失林甫時方同列陰欲中之將加朔
方節度使牛仙客實封九齡稱其不可甚不叶帝旨他
日林甫請見屢陳九齡頗懷誹謗于時方秋帝命高力
士持白羽扇以賜將寄意焉九齡惶恐因作賦以獻又
為鷺詩以貽林甫曰海鷺何微眇乘春亦暫來豈知泥
滓賤只見玉堂開繡戶時雙入華軒日幾迴無心與物
競鷹隼莫相猜林甫覽之知其必退恚怒稍解

九齡洎裴耀卿罷免之日自中書至月華門將就班列
二人鞠躬卑遜林甫處其中揚揚自得觀者竊謂一鷗
挾兩兔俄而詔張裴為左右僕射罷知政事林甫視其
詔大怒曰猶為左右丞耶二人趨就本班林甫目送之
公卿不覺股慄子美八哀詩曰相國生南紀金璞無留
礦仙鶴下人間獨立霜毛整矯然江海思復與雲露求

寂寞想土階未遑等箕頰上君白玉堂倚君金華省

九齡

登進士第應拔萃登乙科拜校書郎明皇在東
宮舉天下文章之士親加策問九齡對策高第碣石歲

崢嶸天地日蛙黽退食吟大庭何心託榛梗骨驚畏曩

哲鬢變負人境雖蒙換蟬冠右地慙多幸

侍中冠加貂蟬九齡為相

以文雅為上知右相李林甫惡之引牛仙客以傾之遂罷

敢忘二踈歸痛迫蘇耽井

紫綬映暮年荊州謝所領

初九齡為相薦長安尉周安周子諒為監察御史至是子

諒以妄陳休咎上親加詰問令於朝堂決殺之九齡坐引非其人左選荊州大都督府長史者久之庾公

興不淺黃霸鎮每靜賓官引調同諷詠在務屏詩罷地

有餘篇終語清省一陽發陰管淑氣含公鼎乃知君子

心用才文章境

九齡善屬文有集二十卷

散帙起翠螭倚薄巫廬並

綺麗玄暉擁牋誅任昉騁自我一家則未缺隻字警千
秋滄海南名繫朱鳥影歸老守故林戀闕情延頸波濤
良史筆蕪絕大庾嶺向時禮數隔制作難上請再讀徐
孺碑猶思理煙艇

九齡字子壽曲江人輔明皇為賢宰相既卒明皇每用
人必曰風度能若九齡乎張說論其文曰如輕縑素練
實濟時用而窘邊幅

柳子厚叙楊評事文集云文有二道辭令褒貶本乎著

作者流蓋迷於書之謨訓春秋之筆削其要在於高壯
廣厚詞正而理備謂宜藏於簡冊也比興者流蓋出乎
虞夏之詠歌周之雅頌其要在乎麗則清越言暢意美
謂宜流於淫誦也唐興以來稱是選而不作者梓潼陳
拾遺其後燕公文以著述之餘攻比興而莫能極張曲
江以比興之隙窮著作而不克備其餘各探一隅相與
皆馳於道者其去彌遠文之難兼斯甚矣中書舍人姚
子顏狀其行曰公所得俸祿悉歸鄉園先得賜物上表

進納其清約如此常賦詩曰清節往來苦壯容離別衰
有以見公之情也公以風雅之道興寄為主一句一詠
莫非興寄時皆諷誦焉

明皇送張說巡朔方賜詩云命將綏邊服雄圖出廟堂
說應制詩有從來思博望許國不謀身之句張嘉正云
山川者是陣草木想為兵盧從愿云佇聞歌杖杜凱入
繫名王徐知仁云由來詞翰手今見勒燕然皆取制勝
之義獨九齡詩云宗臣事有征廟筭在休兵天與三台

座人當萬里城朔南方偃革河右誓揚旌又曰威風六
郡勇計日五戎平山甫歸應疾留侯功復成大抵取旋
師偃武之義宋璟詩云以智泉寧竭其徐海自清亦有
深意也

釋皎然讀曲江集詩云相公乃天啓人文佐生成立程
正顏靡繹思何縱橫春杼弄細綺陽林敷玉英飄然飛
動姿邈矣高簡情後輩驚失步前修敢爭衡始欣耳目
遠再使幾慮清體正力已全理精識何妙昔年歌陽春

徒推郢中調今朝聽鸞鳳豈獨蘇門嘯帝命鎮雄州詩
流據上游才兼荆衡秀氣助瀟湘秋逸蕩子山匹怪奇
文暢儔沈吟未終卷變態紛難數耀耳代明璫襲衣比
芳杜惜惜聞玉聲寤寐在靈府

崔國輔

少年行云遺却珊瑚鞭白馬驕不行章臺折楊柳春草
路傍情

魏宮詞云朝日點紅粧擬上銅雀臺畫眉猶未竟魏帝

使人催

長信宮云長信宮中草年年愁處生時侵珠履迹不使
玉階行

怨詞云妾有羅衣裳秦王在時作為舞春風多秋來不
堪着

古意云歸來日尚早却欲向芳洲渡口水流急回舟不
自由

子美獻三賦國輔于休烈每稱述焉子美有留贈集賢

院崔于二學士詩云欲整還鄉旆長懷禁掖垣謬稱三
賦在難述二公息太白有送崔度自幽燕還吳詩云故
人禮部員外國輔之子也國輔明皇時應縣令舉授許
昌令集賢直學士禮部員外郎坐王鉞近親貶晉陵郡
司馬

商璠云國輔詩婉孌清楚深宜諷味樂府數章雖絕句
然古人不能過也

雜詩云逢着平樂兒論交鞍馬前與酌一斗酒恰用十


千錢後余在關內作事多迍邅何處肯相救徒聞寶劍
篇

古意云淨掃黃金階飛霜厚如雪下簾彈箜篌不忍見
秋月

湖南云湖南送君去湖北送君歸湖裏鴛鴦鳥雙雙他
自飛

香風詞云洛陽梨花白如霰河陽桃葉生復齊坐惜玉
樓春欲盡紅綿粉絮衰粧啼

對酒吟云行行日將夕荒村古塚無人迹蒙籠荆棘一
鳥吟屢唱提壺沽酒喫古人不達酒不足遺恨精靈傳
此曲寄言世上諸少年平生且盡杯中綠



唐詩紀事卷十五